

**AKASHVANI(AIR)**  
**RNU:KOLKATA**  
**BengaliText Bulletin**

**Date 02-12-2025**

**Time: 7.35 A.M.**

বিশেষ বিশেষ খবর:-

- ১) রাজ্যের দুহাজারের বেশি বুথে একশো শতাংশ অনুমারেশন ফর্ম জমা পড়ায় নির্বাচন কমিশন সংশ্লিষ্ট জেলার নির্বাচনী আধিকারিকদের কাছ থেকে বিস্তারিত রিপোর্ট তলব করেছে। আজ সকাল ১০-টার মধ্যে সেই রিপোর্ট জমা দিতে বলা হয়েছে।
- ২) রাজ্যে বিধানসভা নির্বাচনে ব্যয় সংক্রান্ত বিষয়ে নজরদারি চালানোর লক্ষ্যে মুখ্য নির্বাচনী আধিকারিক মনোজ কুমার আগরওয়াল আগামী সপ্তাহে সংশ্লিষ্ট দফতরগুলির সঙ্গে এক বৈঠকে বসতে চলেছেন।
- ৩) আরজি কর হাসপাতালের আর্থিক দুর্নীতির মামলায় কেন্দ্রীয় তদন্ত ব্যুরো সিবিআই দ্বিতীয় চার্জশিট পেশ করেছে, এতে হাসপাতালের প্রাক্তন ডেপুটি সুপার আখতার আলি সহ দু-জনের নাম রয়েছে।
- ৪) এস এস সি, শিক্ষাকর্মী নিয়োগের জন্য আবেদনের সময়সীমা ৮-ই ডিসেম্বর পর্যন্ত বাড়িয়েছে।
- ৫) রাজ্যের বিভিন্ন সরকারী প্রকল্পের কাজের অগ্রগতি নিয়ে মুখ্যমন্ত্রী মমতা ব্যানার্জী আজ বৈঠকে বসছেন। তারপরই তিনি যাবেন জেলা সফরে।
- ৬) বাতাসের উপরিস্তরে পশ্চিমী ঝঞ্ঝার প্রভাবে কলকাতায় সর্বনিম্ন তাপমাত্রা আজ হঠাৎ অনেকটাই বেড়ে গেছে।

oooooooooooooooooooo

রাজ্যের দুহাজারের বেশি বুথে একশো শতাংশ এনুমারেশন ফর্ম জমা পড়ায় নির্বাচন কমিশন সংশ্লিষ্ট জেলার নির্বাচনী আধিকারিকদের থেকে বিস্তারিত রিপোর্ট তলব করেছে।

কমিশন সূত্রে জানা গেছে মোট ২,২০৮টি বুথে একটিও ‘আনকলেস্টেবল’ এনুমারেশন ফর্ম পাওয়া যায়নি। অর্থাৎ এই সমস্ত বুথে মৃত বা স্থানান্তরিত কোন ভোটার নেই। আজ সকাল ১০টার মধ্যে এই সমস্ত বুথে এনুমারেশন ফর্ম সম্পর্কিত রিপোর্ট জমা দিতে বলা হয়েছে। ওই রিপোর্টে সংশ্লিষ্ট বুথগুলির ইলেক্টোরাল রেজিস্ট্রেশন অফিসার (ইআরও)-এর সই থাকা বাধ্যতামূলক। জেলা নির্বাচন আধিকারিক (ডিইও)রা সেই রিপোর্টে কাউন্টার সিগনেচার বা পাল্টা স্বাক্ষর করে জমা দেবেন।

এদিকে, নির্বাচন কমিশন এনুমারেশন ফর্মে ভুল তথ্য সংশোধনের সুযোগ দেবে বলে জানিয়েছে। গতকাল এই মর্মে এক বিজ্ঞপ্তি জারি করা হয়। কমিশন সূত্রে জানা গেছে, ভোটারদের তথ্য নথিভুক্ত করার ক্ষেত্রে কোন ভুল হয়ে থাকলে এবার তা সংশোধন করা যাবে। বুথস্তরের আধিকারিক বিএলও এবং ইলেক্টোরাল রেজিস্ট্রেশন অফিসার (ইআরও)-দের ওই সুযোগ দেওয়া হবে।

নির্বাচন কমিশন নিযুক্ত স্পেশাল রোল পর্যবেক্ষক সুরত গুপ্ত এসআইআর প্রক্রিয়া সম্পর্কিত অভিযোগগুলি সমাধানের জন্য জনসাধারণ, রাজনৈতিক দল ও সংগঠনগুলির সঙ্গে পরামর্শ শুরু করেছেন।

গতকাল, সিপিআই(এম) এবং কংগ্রেসের সদস্যরা গতকাল তাদের উদ্বেগ প্রকাশ করার জন্য বিশেষ রোল পর্যবেক্ষকের সঙ্গে দেখা করেন। এস আই আর ফর্ম জমা দেওয়ার সময়সীমা আরও এক মাস বাড়ানোর দাবি জানিয়ে প্রদেশ কংগ্রেসের এক প্রতিনিধি দল তাঁর কাছে স্মারকলিপি জমা দেন।

অন্যদিকে, এনুমারেশন পর্বের শেষ লগ্নে নিজেদের কাজ প্রায় শেষ করে স্বস্তিতে বিএলও-রা। যাদবপুর বিধানসভা কেন্দ্রের এক বিএলও আকাশবাণীকে জানালেন প্রচুর চাপ নিতে হলেও এ তাঁর কাছে এক সম্পূর্ণ নতুন অভিজ্ঞতা।

(বাইট - চন্দ্রিমা)

বিজেপি অভিযোগ করেছে, কয়েকজন জন ব্লক উন্নয়ন আধিকারিক রাজনৈতিক উদ্দেশ্য প্রণোদিতভাবে বিএলওদের ওটিপি শেয়ার করার জন্য চাপ দিচ্ছেন। এর উদ্দেশ্য মৃত, স্থানান্তরিত ভোটার এবং অবৈধ বাংলাদেশী অভিবাসীদের নাম এসআইআর প্রক্রিয়ায় অন্তর্ভুক্ত করা।

এসআইআর তালিকায় বেশকিছু নাম অবৈধভাবে নথিভুক্ত করা হয়েছে এই অভিযোগ করে বিরোধী দলনেতা শুভেন্দু অধিকারীর নেতৃত্বে পরিষদীয় দলের সদস্যরা গতকাল মুখ্য নির্বাচনী আধিকারিকের কাছে স্মারকলিপি জমা দেন।

পরে সাংবাদিক বৈঠকে বিরোধী দলনেতা বলেন, ২৬,২৭ ও ২৮শে নভেম্বর এই তিন দিনে নথিভুক্ত করা নামের সংখ্যা ৫ কোটি ৫০ লক্ষ থেকে আশ্চর্যজনকভাবে বেড়ে ৬ কোটি ৭৫ লক্ষে পৌঁছেছে। এই তিন দিনে এন্ট্রি করা হয়েছে ১ কোটি ২৫ লক্ষ নাম।

(বাইট - শুভেন্দু)

একই সঙ্গে দলের পক্ষ থেকে হিয়ারিং-এর সময় সিসিটিভি চালু রাখা এবং মুখ্য নির্বাচনী আধিকারিকের দপ্তরে কন্ট্রোল রুম থেকে তার ওপর নজরদারি চালানোর দাবিও জানানো হয়েছে।

০০০০০০০০০০০০০০০০০০০০০০০০

রাজ্যের মুখ্য নির্বাচনী আধিকারিকের দপ্তরের বাইরে বিরোধী দলনেতা শুভেন্দু অধিকারী সহ বিজেপি প্রতিনিধি দল এবং বিএলও অধিকার রক্ষা কমিটি'-র সদস্যদের বাদানুবাদের জেরে গতকাল তীব্র উত্তেজনা সৃষ্টি হয়। দু-পক্ষকে সামলাতে পুলিশকে হিমসিম খেতে হয়। পরে বিজেপি নেতাদের কর্ডন করে পুলিশ সেখান থেকে বের করে নিয়ে যায়।

০০০০০০০০০০০০০০০০০০০০০০০০

রাজ্যে আগামী বিধানসভা নির্বাচনে ব্যয় সংক্রান্ত বিষয়ে নজরদারি চালানোর লক্ষে মুখ্য নির্বাচনী আধিকারিক মনোজ কুমার আগরওয়াল সংশ্লিষ্ট দফতরগুলির সঙ্গে এক বৈঠকে বসতে চলেছেন। আগামী ১১-ই ডিসেম্বর বৃহস্পতিবার কলকাতার Bengal Chamber of Commerce and Industry-তে সকাল সাড়ে ১১ টায় ওই বৈঠক হওয়ার কথা। রাজ্যের মুখ্য নির্বাচনী আধিকারিকের দপ্তরের অন্যান্য শীর্ষ আধিকারিক রাজ্য পুলিশের ডিজি, কলকাতার নগরপাল, চিফ পোস্ট মাস্টার জেনারেল ওয়েস্ট বেঙ্গল সার্কেল, ডিরেক্টর জেনারেল অফ ইনকাম ট্যাক্স ( ওয়েস্ট বেঙ্গল) রিজার্ভ ব্যাঙ্কের রিজিওনাল ডিরেক্টর, SLBC-র এরাড্যের আহ্বায়ক, কমিশনার অফ কমার্শিয়াল ট্যাক্সেস, কমিশনার অফ Excise , আইজি সীমা সুরক্ষা বল পূর্ব রেলের আইজি ও PCSC RPF সহ ২৫-টি দপ্তরের শীর্ষ

আধিকারিকদের ওই বৈঠকে যোগদানের কথা। রাজ্যে বিগত নির্বাচনে ব্যয় সংবেদনশীল নির্বাচনী এলাকা সহ বিভিন্ন বিষয় বৈঠকে পর্যালোচনা করা হবে।

০০০০০০০০০০০০০০০০০০০০

আরজি কর হাসপাতালের আর্থিক দুর্নীতির মামলায় কেন্দ্রীয় তদন্ত ব্যুরো সিবিআই দ্বিতীয় চার্জশিট পেশ করেছে।

আলিপুরে বিশেষ সিবিআই আদালতে গতকাল পেশ করা এই চার্জশিট হাসপাতালের প্রাক্তন ডেপুটি সুপার আখতার আলির নাম রয়েছে। তিনিই এই দুর্নীতির অভিযোগে সরব হয়ে কলকাতা হাইকোর্টে মামলা দায়ের করেন, সিবিআই তদন্তেরও দাবি জানান। সেই মামলাতেই বিচারপতি রাজর্ষি ভরদ্বাজ এই দুর্নীতি নিয়ে সিবিআই-কে তদন্তভার দিয়েছিলেন। চার্জশিটে আখতার আলি ছাড়াও শশীকান্ত চন্দক নামে আর এক অভিযুক্তের নাম রয়েছে। দু-জনের বিরুদ্ধেই গুরুতর আর্থিক অনিয়ম ও দুর্নীতিতে জড়িত থাকার প্রমাণ মিলেছে বলে চার্জশিটে উল্লেখ করা হয়। আদালত সূত্রে জানা গেছে, এটিই সম্ভবত এই মামলার চূড়ান্ত চার্জশিট।

এদিকে, আর জি কর হাসপাতালে দুর্নীতির তদন্তের দাবিতে যিনি মামলা করলেন, তিনিই এতে জড়িত বলে সিবিআইয়ের চার্জশিটে যে উল্লেখ করা হয়েছে তাতে হতবাক সংশ্লিষ্ট মহল।

০০০০০০০০০০০০০০০০০০০০

২৬ হাজার চাকরি বাতিলের নির্দেশ পুনর্বিবেচনা এবং নতুন নিয়োগ প্রক্রিয়ায় স্বগিতাদেশের আবেদন সুপ্রিম কোর্ট ফের একবার খারিজ করে দিয়েছে। প্রধান বিচারপতি সূর্যকান্ত ও বিচারপতি জয়মাল্য বাগচির বেঞ্চ স্পষ্ট জানিয়েছে, চাকরি বাতিলের রায়ে নতুন করে হস্তক্ষেপ করবে না শীর্ষ আদালত। পাশাপাশি এস এস সি-র যে নতুন নিয়োগ প্রক্রিয়া হচ্ছে তাতে স্বগিতাদেশ দিতেও অস্বীকার করেছে বেঞ্চ।

উল্লেখ, এর আগে সুপ্রিম কোর্টের অন্য একটি বেঞ্চ এস এস সি নিয়োগ সংক্রান্ত সমস্ত মামলা কলকাতা হাইকোর্টে ফেরত পাঠিয়েছে।

০০০০০০০০০০০০০০০০০০০০

এদিকে, স্কুল সার্ভিস কমিশন শিক্ষাকর্মী নিয়োগের জন্য আবেদনের সময়সীমা বাড়িয়েছে। গ্রুপ সি ও গ্রুপ ডি পদে ৮ ডিসেম্বর পর্যন্ত অনলাইনে আবেদন জানানো যাবে। তেশরা নভেম্বর থেকে আবেদন জানানোর কাজ চলছে। এর আগে এই সময়সীমা তেশরা ডিসেম্বর পর্যন্ত থাকলেও, তা বাড়িয়ে আগামী ৮ তারিখ পর্যন্ত করা হয়।

উল্লেখ্য, গ্রুপ-সি-তে ২ হাজার ৯-শো ৮৯-টি এবং গ্রুপ-ডি-তে ৫ হাজার ৪-শো ৮৮টি শূন্য পদের জন্য নিয়োগ হবে। কমিশন সূত্রে জানা গেছে এখনো পর্যন্ত ১০ লক্ষ আবেদন জমা পড়েছে। তবে ২০১৬ এর তুলনায় তা কম।

০০০০০০০০০০০০০০০০০০০০

আকাশবাণী কলকাতা, ১০ টি জেলার জন্য চুক্তির ভিত্তিতে আংশিক সময়ের সাংবাদিক নিয়োগ করবে। জেলাগুলি হল- বীরভূম, আলিপুরদুয়ার, পশ্চিম বর্ধমান, দার্জিলিং, দক্ষিণ দিনাজপুর, ঝাড়গ্রাম, কালিম্পং, হুগলী, পূর্ব মেদিনীপুর এবং কলকাতা। এ সংক্রান্ত যাবতীয় তথ্য [www.newsonair.gov.in](http://www.newsonair.gov.in) -এ পাওয়া যাবে। আবেদন জানানোর শেষ তারিখ, ১৫ই ডিসেম্বর।

০০০০০০০০০০০০০০০০০০০০

রাজ্যে বিভিন্ন সরকারি প্রকল্পের কাজের অগ্রগতি নিয়ে মুখ্যমন্ত্রী মমতা ব্যানার্জি আজ বৈঠকে বসছেন। নবান্ন সংলগ্ন সভাঘরে প্রস্তাবিত এই বৈঠকে উপস্থিত থাকার জন্যে মুখ্যসচিব মনোজ পন্থ, স্বরাষ্ট্রসচিব নন্দিনী চক্রবর্তী ডিজি রাজীব কুমার ছাড়াও সব দপ্তরের সচিবকে নির্দেশ দেওয়া হয়েছে। সব জেলাশাসকরাও ভারুয়ালী বৈঠকে যোগ দেবেন। বৈঠকে বিভিন্ন দপ্তরের কাজের অগ্রগতি নিয়ে বার্ষিক রিপোর্ট পেশ করা হতে পারে।

অন্যদিকে, আজকের বৈঠকের পরেই মুখ্যমন্ত্রীর মুর্শিদাবাদ রওনা হওয়ার কথা। এস আই আর-এর বিরোধিতা সহ বেশকিছু কর্মসূচী নিয়ে মুর্শিদাবাদ থেকেই শুরু হচ্ছে মুখ্যমন্ত্রীর জেলা সফর। আগামীকাল মালদার গাজলে একটি জনসভা করবেন তিনি। এছাড়াও চার তারিখ বহরমপুরে প্রশাসনিক বৈঠকে যোগ দেবেন মুখ্যমন্ত্রী। আগামী ৯ তারিখ কোচবিহারে একটি পদযাত্রার পর জনসভা করবেন মুখ্যমন্ত্রী।

০০০০০০০০০০০০০০০০০০০০

তাল গাছের ডোঙ্গা নিয়ে সুন্দরবনের নদী খাঁড়িতে মাছ ধরতে যাওয়া প্রান্তিক মৎস্যজীবীদের ধর্না নবম দিনে পড়ল। গত একুশে নভেম্বর বিশ্ব মৎস্যজীবী দিবসে কুলতলী বিট অফিসের সামনে তৈরি করা ধরনা মঞ্চ ভেঙে দেবার অভিযোগে দক্ষিণ বঙ্গ মৎস্যজীবী ফোরাম এই কর্মসূচি শুরু করে। এর মধ্যে মৈপিঠ কোস্টাল থানার ও সি র মধ্যস্থতায় সমস্যা মেটানোর চেষ্টা ব্যর্থ হলে বন্যপ্রাণের হাত থেকে রক্ষা পেতে সংগঠনের পক্ষ থেকে পূর্ব গুড়গুড়িয়া গ্রামের শীতলা মন্দির বটতলায় ধর্না মঞ্চ স্থানান্তর করা হয়। সংগঠনের সম্পাদক মিলন দাস জানিয়েছেন, বার্ষিক নবীকরণযোগ্য পারমিট এর জন্য ব্যক্তিগত আবেদন পত্র বনদপ্তর গ্রহণ করছে না। সুন্দরবন ব্যাঘ্র প্রকল্পের সম্প্রসারণ বাতিল এবং তিন মাস নদী খাঁড়িতে মাছ ধরায় নিষেধাজ্ঞা চলাকালীন রাজ্য সরকারের ঘোষণামত পাঁচ হাজার টাকা ভাতা অবিলম্বে চালু করতে হবে বলে দাবী জানানো হয়েছে।

০০০০০০০০০০০০০০০০০০

বাতাসের উপরিস্তরে পশ্চিমী ঝঞ্ঝার প্রভাবে কলকাতায় সর্বনিম্ন তাপমাত্রা আজ হঠাৎ অনেকটাই বেড়ে গেছে। সকালে আলিপুরে সর্বনিম্ন তাপমাত্রা রেকর্ড করা হয় ২০ ডিগ্রি সেলসিয়াস স্বাভাবিকের থেকে যা প্রায় সাড়ে তিন ডিগ্রি বেশি।

পশ্চিমী ঝঞ্ঝার কারণে গতকাল থেকেই আকাশ মেঘলা , তবে আজ থেকে তা কেটে যাওয়ার সম্ভাবনা।

আগামীকাল থেকে উত্তরে বাতাসের শক্তি কিছুটা বাড়বে ফলে রাজ্যের প্রায় সব জেলাতেই সর্বনিম্ন তাপমাত্রা ২ থেকে ৪ ডিগ্রি পর্যন্ত কমতে পারে বলে আবহাওয়া দপ্তরের পূর্বাঞ্চলীয় প্রধান ডঃ হাবিবুর রহমান বিশ্বাস আকাশবাণী কে জানিয়েছেন।

(বাইট)

০০০০০০০০০০০০০০০০০০০

000